

© S M A H



## EEBBAA MAHAD LEH

Heesaha buuggan yar ku xafidan waa lix;  
waan ku tacab jirnaa badinta tirada heesahan (iyo  
sixista wixii ilduuf ah ee qoristooda raaca iyo waliba  
macnaynta ereyada qaar).

Ha ka xishoonin in aad rogoto, oo aad kaydsato  
buuggan yar—u akhri carruuraha kugu gadaaman, oo  
u daar daar cododka hobollada heesahan qaada(y)!

Waxaa buuggan soo habeeyay Idiris Cali, agaasimaha  
BADSO\* ([www.badso.org](http://www.badso.org)).

Fadlan, bogga ugu dambeeya ee buuggan kala soco  
magacyada curiyayaasha heesahan.

*Xuquuqaha lahaanshiyeed ee heesahan waxa ay u  
kala dhawran yihiin curiyayaasha.*

Idiris Cali, Boston, MA USA

November 6, 2014

\* Barashada Afka iyo Dhaqanka Soomaaliyeed (BADSO)

Na la jaal: [Facebook.com/afkeenna](https://www.facebook.com/afkeenna)

# Alif la kor dhabay!



I

Ambaqaadka geeddiga  
Sida awrta loo raro  
Heesaha u gaarka ah  
Waxa lagu aloosaa  
Magac Eebbahay iyo  
Addin iyo af wada jira

II

Shanta tiir Islaam waa  
Jiritaanka Eebbahay  
Igmad Muxammadkeennii  
Oogidda salaad soon  
Sakadoo la bixiyiyo  
Xajkoo loo awoodaa

III

Waayaha adduunyada  
Waxa lagu abbaaraa  
Aragtidu ku naaxdaa  
Ku abyamay kas iyo maan  
Ilayksii ka baxa iyo  
Iftiinkiyo aqoontee

Alif la kor dhabay  
Alif la hoos dhabay  
Alif la goday

Aa alif la kor dhabay alif lagu reeb  
Ii alif la hoos dhabay yaa lagu reeb  
Uu alif la goday wow lagu reeb

# Arday baan ahay!



I

Arday baan ahay oo  
Arday baan ahay oo  
Ubaxii waddankaan ahaye

Waxan u ordayaa, u ordayaa  
Dugsiyada u aadaa  
In aan aqoon kororsadoo  
Dadkayga anfacee

Dadaalkii la imide  
Allahayow igu gargaar  
Aamiin, Aamiin  
Ilaahayow igu gargaar

II

Arday baan ahay oo  
Arday baan ahay oo  
Iftinkii arooryaan ahaye

Waxan u ordayaa, u ordayaa  
Imtixaan u galaa  
In aan Aabbiyo Hooyo  
Abaalkoodi u gudee

Dadaalkii la imide  
Allahayow igu gargaar  
Aamiin, Aamiin  
Ilaahayow igu gargaar

Alla maanta ayaanta!

# Ciid Wanaagsan!

I

Alla maanta ayaanta  
Iyo iidda wanaagsan  
Ilaahii ina siiyay  
Isagaa ku abaal leh  
Way ahaataye maanta  
Si wanaagsan u iida

III

Arday joogta iskuulka  
Odayaal talinaaya  
Ilaahii ina siiyay  
Isagaa ku abaal leh  
Way ahaataye maanta  
Si wanaagsan u iida

II

Calankeenna iftiimay  
Xiddigtaa ku astaysan  
Ilaahii ina siiyay  
Isagaa ku abaal leh  
Way ahaataye maanta  
Si wanaagsan u iida

IV

Hadba kii arrin keena  
Kan kalee aqbalaaya  
Ilaahii ina siiyay  
Isagaa ku abaal leh  
Way ahaataye maanta  
Si wanaagsan u iida

# Bal eegoo, u fiirsada!



I

Goroyadu ilmaheeda  
Aroori bay dhigtaayoo  
Aboodigu ku laayaa  
Shinbirtuna aroos ay  
Ilaxidhoo amaan ah bay  
Ubadkeeda seexisaa  
Kala awran labaduye  
Edebtiyo aqoontiyo  
Asluubtay isku dhaafeen  
Aqligii wanaagsani  
Itaal in uu ka roon yahay  
Bal eegoo u fiirsada

II

Ilko weynow maroodigu  
Araddaduu mirtaa baa  
Cadawgu ku ugaadhaa  
Aboorkuna dundumadaan  
Aragtay buu dhistaa yuu  
Naftiisa ku ilaaliyaa  
Kala awran labaduye  
Edebtiyo aqoontiyo  
Asluubtay isku dhaafeen  
Aqligii wanaagsani  
Itaal in uu ka roon yahay  
Bal eegoo u fiirsada

III

Ma ogtihiin sagaaradu  
Awaarahay qoddaayooy  
Saaladeeda ku aastaa  
Libaaxuna ma asturee  
Hilimmaduu ka arooraan  
Digadiisa ku aragnaa  
Kala awran labaduye  
Edebtiyo aqoontiyo  
Asluubtay isku dhaafeen  
Aqligii wanaagsani  
Itaal in uu ka roon yahay  
Bal eegoo u fiirsada

# Calankeenu waa cirkoo kale!



I

Qoloba calankeedu waa caynoo  
Inaga keenu wa cirkoo kale oo  
An caadna lahayne caashaqa

III

Cishadad dhalataad calooshayadii  
Sidii culaygii cidaad marisee  
Allow ha ku celin cawoy dhaha

II

Xidigyay caddi waad na ciidamisee  
Carrada kaligaa adow curadee  
Cadceedda sideeda caan noqa

IV

Shanteen cududood cadkii ka maqnaa  
Adow celiyooyna caawimayee  
Wa calaf cimriga isku keen simayee

# Soomaaliyeey toos!



Soomaaliyeey toos oo  
Toos oo isku tiirsada eey  
Hadba kiinna taag daran eey  
Taageera waligiin eey

II

Idinkaysu tookhaayoo  
Idinkaysu taamaayee  
Aadamuhu tacliin baray oo  
Waddankiisa taam yeel yeey

V

Tuldo geela oo dhacan baad  
Toogasho u badheedhaanee  
Ma dhulkaas dhane tagay baan  
Ninna “dhagax” u tuurayn eey?

III

Sharcigaysku kiin tolay oo  
Luqadaa tu’ waaxid ah oo  
Arligiinna taaka ah oo  
Kuma kala tagaysaan eey

VI

Qaran aan hubkuu tumayoo  
Toorreyda dhaafayneeyn  
Oon taar samayn karihayn  
Uur-ku-taallo weynaa yeey

IV

Tiro adhiya oo dhaxalaa  
Sidad laydin soo tubay oo  
Ninba toban la meel maray oo  
Cadowgiin idiin talin eey

VII

Hadba waxan la taahaayoo  
Togagga uga ooyaa yeey  
Nin dalkiisi cadow taaboo  
U tol waayay baan ahay eey

“ALLAA WEYN, [QOF]KII AAMINAA AWOOD LEH”  
—*Abwaan M. Tukaale Cismaan*

Curiyayaasha heesaha buuggan yar ku xafidan waxa ay  
kala yihiin:

Siciid Saalax Axmed. [Alif la kor dhabay.](#)

Xuseen Aw Faarax. [Arday baan ahay.](#) [Calankeennu waa cirkoo kale.](#)

Cabdilqaadir Cabdi Shube. [Alla maanta ayaanta.](#)

Xasan Sheekh Muumin. [Bal eegoo, u fiirsada.](#)

Cali Mire Cawaale. [Soomaaliyeey toos.](#)

Sawirrada quruxda badan leh ee buuggan waxa aan ku  
suugaamay halkan: <http://www.abcya.com>. Sawirrada  
qaar (sida: goroyada, shimbirta, iwm) waxa aan ka soo  
bixiyay Bing Search (via PowerPoint). Sawirka calanka  
(cawska iyo cirka) waxa aan ka soo bixiyay  
[Ceegaag.net](http://Ceegaag.net).

---

Haddii aad ka heshay mashruucan, dhammaystirkiisa gacan  
ka gayso, oo na la wadaag heesaha Soomaaliyeed (ee kale)  
ee ku saabsan diinta, dhaqanka, waxbarashada, iwm. Fadlan,  
xogtan iyada ah ku soo gudbi [Facebok.com/afkeenna](https://www.facebook.com/afkeenna), ama  
noogu soo dir cinwaanka: [idiris.m.cali@gmail.com](mailto:idiris.m.cali@gmail.com).

**MAHADSANID**

